

**Grad Novi Pazar**  
**Skupština grada**  
**Odbornici SDA Sandžaka**  
**Novi Pazar**  
**17. mart 2024. godine**

**P R E D S J E D N I K U**  
**SKUPŠTINE GRADA NOVOG PAZARA**

Na osnovu člana 44. stav 1. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 109. stav 2. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo prijedlog **da se iz predloženog dnevnog reda** sjednice Skupštine grada Novog Pazara zakazane za 18. mart 2024. godine, **povuče tačka 22. Prijedlog Rješenja o imenovanju vršioca dužnosti direktora Javnog preduzeća za uređivanje građevinskog zemljišta “Novi Pazar”;**

**O b r a z l o ž e n j e:**

Zakonom o javnim preduzećima u članu 52. stav 4. propisano je da vršilac dužnosti direktora mora ispunjavati uslove za imenovanje direktora javnog preduzeća iz člana 25. ovog zakona. Članom 25. Zakona o javnim preduzećima propisani su uslovi koje mora ispunjavati i lice koje se imenuje za vršioca dužnosti direktora. Ovim članom zakona propisano je da kandidat za vršioca dužnosti direktora javnog preduzeća, između ostalog, treba imati najmanje pet godina radnog iskustva na poslovima za koje se zahtjeva visoko obrazovanje te da ima najmanje tri godine radnog iskustva na poslovima koji su povezani sa poslovima javnog preduzeća.

Iz priložene biografije kandidata za vršioca dužnosti direktora, koja je dostavljena u materijalu, ne može se utvrditi da predloženo lice ima potrebno radno iskustvo od pet godina kako je to utvrđeno u članu 25. stav 1. tačka 3. Pored toga, iz priložene biografije, evidentno je da kandidat za vršioca dužnosti direktora Javnog preduzeća za uređivanje građevinskog zemljišta ne ispunjava ni uslov iz člana 25. stav 1. tačka 4. jer

nema tri godine radnog iskustva na poslovima koji su povezani sa poslovima javnog preduzeća. Uzimajući u obzir da predloženi kandidat ne ispunjava zakonom propisane uslove Skupština grada ne može istog imenovati na poziciju vršioca dužnosti direktora. Shodno tome neophodno je predloženu tačku dnevnog reda, Prijedlog rješenja o imenovanju vršioca dužnosti direktora Javnog preduzeća za uređivanje građevinskog zemljišta, povući iz predloženog dnevnog reda za sjednicu Skupštine grada Novom Pazara.

Pored nastupanja razloga, po sili zakona, zbog kojih se ova tačka dnevnog reda ne može razmatrati, važno je naglasiti da se na osnovu neregularnih i pokradenih izbora ne mogu vršiti nikakva imenovanja niti dijeliti bilo kakve funkcije. Dok se Ustavni sud ne izjasni o regularnosti izbora, Skupština grada Novog Pazara sa 19 spornih mandata i upitnim legitimitetom i legalitetom ne može vršiti imenovanja i na taj način produbljivati institucionalnu krizu koja postoji u Novom Pazaru a koja je uzrokovana krađom na izborima. Rezultati izbora nisu odraz političkog raspoloženja građana Novog Pazara, već su rezultat izborne krađe i izbornih nepravilnosti, što je i potvrđeno Rezolucijom Evropskog parlamenta o Srbiji od 8. februara 2024. godine a naročito konačnim izvještajem ODIHR-a (ODIR-a) od 28. februara 2024. godine o izborima u Srbiji.

Shodno tome tražimo da se ova tačka dnevnog reda povuče sa dnevnog reda i odloži dok se ne steknu pravni i politički uslovi da se o ovom pitanju Skupština izjasni.

### **Odbornici SDA Sandžaka u Skupštini grada**

dr. Adem Đerlek

Džanan Bačićanin

Merfid Kamešničanin

Maida Baltić Spahović

Saima Brunčević

Dinheta Pulić

Kenan Kadrić

Kadir Trubljanin

Adem Pepić

Ilma Dupljak

Ovlašteni predstavnik predlagača je odbornik Kenan Kadrić